

## *Қизиқарли психология ҳақида бир сўз.....*

Тўлин ой уфқнинг энг баланд нуқтасига кўтарилиб турибди. Атрофингиздаги ўртоқларингиздан ойнинг катталиги қанча деб сўраб кўринг. Баъзилари ойнинг катталиги тарвуздек деса, баъзилари кулчадек дейди, яна бошқаси эса тангадек деб жавоб беради. Мабодо ўртада баҳс кўтарилгудек бўлса, ким ҳақ эканлигини исботлаб бўлмайди: сабаби турли кишиларга ойнинг катталиги турлича бўлиб кўринади. Ёки ой расмини ўқиётган китобимизга чизсак ва унга йигирма беш сантиметр наридан туриб қарасак, шунда ой тасвирининг катталиги ушбу китобдаги “О” ҳарфидан сал каттароқ бўлиб кўринади.

Яна бир тажриба, Сиз кўзингизни юмиб ёки қоронғу хонада кўлингизга тушган матони(рўмол) пайпаслаб туриб рангини, нима эканлигини айтиб бера оласизми?

-Балким деяпсизми ? Қатъий жавоб беришга қийналаяпсизми ?

Албатта, қийин. Чунки, бу бизнинг сезгиларимизгагина боғлиқ эмас , балки идрокимизнинг маҳсулидир.

Хўш, идрокни нега “олтинчи сезги” деб ҳам юритганлар?

Келинг, бу ҳақда психология фанига мурожаат этамиз ва идрок психологияси , идрокнинг ноёб жиҳатлари ҳақида билиб оламиз. Сўнгра эса ўзингизда идрок феноменларини ўрганиш аниқроғи билиб олиш (ёки билиб қўйиш ) учун ушбу китобда берилаётган суратлардан фойдаланиб тажриба ўтказиб кўриш имкониятига эга бўласиз. Фақат куйида берилаётган идрок ҳақидаги маълумотлар билан обдон танишиб чиқиб, сўнг расмларни ўрганишга киришинг.